



檢查者 史錫永
覆查者



書	名後漢書	(第拾壹	冊)	共廿叁冊
刊寫時代	宋刊本元明補修			
裝式	包背			
卷數	三十五至三十七			
葉數	柒拾伍			
行格	半葉九行行十六字			
高廣	柒寸高壹尺壹寸捌分廣			
邊口	左右雙邊白口標書右卷數下標葉數底闕標刊工姓名			
印章	首尾本館印			
其他標識及狀況	是冊末卷原紙僅存四葉前兩卷各存十三葉其三五卷之第二二葉前半葉三七卷之第七葉後半葉補字不少微損公私讓讓股署均缺筆			
覆查加注				

中華民國十三年五月二日



列傳卷第二十五

范曄

後漢書三十五

唐章懷太子賢注

張純

子奮

曹褒

鄭玄

張純字伯仁京兆杜陵人也高祖父安世

宣帝時為大司馬衛將軍封富平侯

臣賢案張

安世昭帝元鳳六年以右將軍宿衛忠謹封富平侯今此言宣帝封誤也宣帝即位但益封萬戶耳

放為成帝侍中純少襲爵主哀平間為侍

中王莽時至列卿遭值篡偽多亡為河上純

以敦謹守約保全前封建武初先來詣闕
故得復國五年拜太中大夫使將潁川突
騎安集荆徐揚部督委輸督促也委輸轉運也監諸
將營後又將兵屯田南陽遷五官中郎將
有司奏列侯非宗室不宜復國光武曰張
純宿衛十有餘年其勿廢更封武始侯食
富平之半武始縣屬魏郡富平縣屬平原郡也純在朝歷世明
習故事建武初舊章多闕每有疑議輒以
訪純自郊廟婚冠喪紀禮儀多所正定帝

甚重之以純兼虎賁中郎將數被引見一

日或至數四

過三以至於四也

純以宗廟未定昭穆

失序十九年乃與太僕朱浮共奏言陛下
興於匹庶蕩滌天下誅鉏暴亂興繼祖宗
竊以經義所紀人事衆心雖實同創革而
名為中興宜奉先帝恭承祭祀者也元年
以來宗廟奉祠高皇帝為受命祖孝文皇
帝為太宗孝武皇帝為世宗皆如舊制又
立親廟四世推南頓君以上盡於春陵節

侯

南頓令欽即光武之父
春陵侯買光武高祖也

禮為人後者則為

之子既事太宗則降其私親

太宗謂元帝也
據代相承高祖

至元帝八代光武即高帝九代孫以代數相推故繼
體元帝故曰既事太宗下又云宣元皇帝尊為祖父

又曰自元帝以上祭於洛陽成帝以下祭於長安
其義明矣降其私親謂春陵已下不別序昭穆今

禘祫高廟陳序昭穆而春陵四世君臣並

列以卑廁尊不合禮意設不遭王莽而國

嗣無寄推求宗室以陛下繼統者安得復

顧私親違禮制乎昔高帝以自受命不由

太上宣帝以孫後祖不敢私親故為父立

廟獨羣臣侍祠臣愚謂宜除今親廟以則

二帝舊典願下有司博採其議詔下公卿

大司徒戴涉大司空竇融議宜以宣元成

哀平五帝四世代今親廟宣元皇帝尊為

祖之可親奉祠成帝以下有司行事別為

南頓君立皇考廟其祭上至春陵節侯羣

臣奉祠以明尊尊之敬親親之恩帝從之

是時宗廟未備自元帝以上祭於洛陽高

廟成帝以下祠於長安高廟其南頓四世

隨所在而祭焉明年純代朱浮為太僕二十三年代杜林為大司空在位慕曹參之迹務於無為曹參惠帝時代蕭何為相國遵蕭何法無所變更選辟掾

史皆知名大儒明年上穿陽渠引洛水為

漕上音時丈反陽渠在洛陽城南百姓得其利二十六年詔

純曰禘祫之祭不行已久矣三年不為禮

禮必壞三年不為樂樂必崩論語載宰我之言也宜

據經典詳為其制純奏曰禮三年一祫五

年一禘春秋傳曰大祫者何合祭也毀廟

及未毀廟之主皆登合食乎太祖五年而

再殷周禮三年一祫五年一禘又公羊傳曰大祫者何合祭也合祭奈何毀廟主陳于太祖未

毀主皆升合食于太祖五年而再殷祭注云殷盛也謂三年祫五年禘也漢舊制三年

一祫毀廟主合食高廟存廟主未嘗合祭

元始五年諸王公列侯廟會始為禘祭臣賢

案平帝元始五年春祫祭明堂諸侯王列侯宗室助祭賜爵金帛今純及司馬彪書並云禘祭蓋禘祫俱

是大祭名又前十八年親幸長安亦行此禮

可通也續漢書曰十八年上幸長安詔太常行禘禮禮說

三年一閏天氣小備五年再閏天氣大備

故三年一禘五年一禘禘之為言諦諦定

昭穆尊卑之義也禘祭以夏四月夏者陽

氣在上陰氣在下四月乾卦用事故言陽氣在上也故正尊

卑之義也禘祭以冬十月冬者五穀成熟

物備禮成故合聚飲食也斯典之廢於茲

八年自十八年至此謂可如禮施行以時定議帝從

之自是禘祫遂定時南單于及烏桓來降

邊境無事百姓新去兵革歲仍有年家給

人足仍頗也純以聖王之建辟雍所以崇尊

禮義既富而教者也論語曰子適衛舟子僕子曰庶矣哉舟子曰既庶矣

又何加焉曰富之既富矣又何加焉曰教之也乃案七經識明堂圖識

也解見光武紀七經謂詩書禮樂易春秋及論語也

河閒古辟雍記孝武

太山明堂制度武帝時河閒獻王德獻雅樂對三雍宮有其書記也又武帝封太山

濟南人公玉帶上黃帝時明堂圖明堂中有一殿四面無壁以茅蓋水環宮垣為複道上有樓也及

平帝時議平帝時起明堂徵天下通一藝以上皆議於公車也欲具奏之

未及上會博士相榮上言宜立辟雍明堂

章下三公太常而純議同榮帝乃許之三

十年純奏上宜封禪曰自古受命而帝治

世之隆必有封禪以告成功焉

禮記曰因名山外中于天

鄭玄注曰謂巡守至於方嶽燔柴祭天告以諸侯之成功也

樂動聲儀曰以

雅治人風成於頌

動聲儀樂緯篇名也

有周之盛成康

之間郊配封禪皆可見也書曰歲二月東

巡狩至于岱宗則封禪之義也臣伏見陛

下受中興之命平海內之亂修復祖宗撫

存萬姓天下曠然咸蒙更生恩德雲行惠

澤雨施

易曰雲行雨施品物流形

黎元安寧夷狄慕義詩

云受天之祐四方來賀

下武之詩也鄭玄注云言武王受此萬年之壽

輔佐之臣亦宜蒙餘福也

今攝提之歲倉龍甲寅德在東

宮

爾雅曰太歲在寅曰攝提格建武三十年太歲在甲寅時歲德在東宮前書音義曰蒼龍太歲也

宜及嘉時遵唐帝之典繼孝武之業以二

月東巡狩封于岱宗明中興勒功勳復祖

統報天神禪梁父祀地祇傳祚子孫萬世

之基也中元元年帝乃東巡岱宗以純視

御史大夫從

視比也

并上元封舊儀及刻石丈

武帝元封元年封禪儀令侍中皮弁搢紳射牛行事封廣丈二高九尺有玉牒書書祕其事皆禁禪肅然

天子親拜衣上黃江淮間一茅三脊為神籍五色土雜封縱遠方奇獸飛禽之屬也

三月薨

謚曰節侯子奮嗣

奮字穉通父純臨終勅家丞曰司空無功

於時猥蒙爵土身死之後勿議傳國東觀記曰

家丞名歆奮兄根少被病光武詔奮嗣爵奮稱

純遺勅固不肯受帝以奮違詔勅收下獄

奮惶怖乃襲封永平四年隨例歸國奮少

好學節儉行義常分損租奉奉音扶贍卹

宗親雖至傾匱而施與不怠十年儋耳降

附儋耳郡武帝置故城即今儋州義倫縣也奮來朝上壽引見宣

平殿應對合旨顯宗異其才以為侍祠侯

名臣子孫侍祠封侯解見鄧禹傳建初元年拜左中郎將轉

五官中郎將遷長水校尉七年為將作大

匠章和元年免永元元年復拜城門校尉

四年遷長樂衛尉明年代栢郁為太常六

年代劉方為司空時歲災旱祈雨不應乃

上表曰比年不登人用飢匱今復久旱秋

稼未立立成也陽氣垂盡歲月迫促夫國以

民為本民以穀為命政之急務憂之重者

也臣蒙恩尤深受職過任夙夜憂懼章奏

不能叙心願對中常侍疏奏疏猶條錄也即時

引見復口陳時政之宜明日和帝召太尉

司徒幸洛陽獄錄囚徒收洛陽令陳歆即

大雨三日奮在位清白無它異績九年以

病罷在家上疏曰聖人所美政道至要本

在禮樂五經同歸而禮樂之用尤急孔子

曰安上治民莫善於禮移風易俗莫善於

樂又曰揖讓而化天下者禮樂之謂也禮記

樂記孔子之辭也先王之道禮樂可謂盛矣孔子謂

子夏曰禮以修外樂以制內丘已矣夫禮稽命徵

之辭也宋均注云修外飾容貌也修內又曰禮樂

蕩滌心性也已矣夫恨不制作禮樂也

不興則刑罰不中刑罰不中則民無所厝

其手足臣以為漢當制作禮樂是以先帝

聖德數下詔書愍傷崩缺而衆儒不達議

多駁異臣累世台輔奮七代祖湯武帝時為御史大夫六代祖子孺

宣帝時為衛將軍領尚書父純光武時為司空而大典未定私竊惟

憂不忘寢食臣犬馬齒盡誠莫先死見禮

樂之定先死謂未死之前也十三年更召拜太常復上

疏曰漢當改作禮樂圖書著明見曹褒傳王者

化定制禮功成作樂禮記樂記之文功成化定同耳功謂王業化謂教人也

謹條禮樂異議三事願下有司以時考定

昔者孝武皇帝光武皇帝封禪告成而

禮樂不定事不相副先帝詔曹褒章帝初曹

哀于東觀次序禮事依准舊典凡百五十篇奏之也今陛下但奉而承之

猶周公斟酌文武之道非自為制誠無所疑

周公制禮皆斟酌文武之美德為之等制不自述也今先帝已詔曹褒非陛下出意何所疑而不為也詩頌曰

美乎不顯文王之德之純假以溢我我其收之惠我文王又曰執競武王無競維烈也久執

謙謙令大漢之業不以時成非所以章顯

祖宗功德建太平之基為後世法帝雖善

之猶未施行其冬復以病罷明年卒於家

子甫嗣官至津城門候津城門洛陽南面西門也當洛水浮橋漢官儀

曰候一人秩六百石也甫卒子吉嗣永初三年吉卒無

子國除自昭帝封安世至吉傳國八世張安

世字子孺昭帝時為右將軍始封富平侯卒子延壽嗣卒子勃嗣卒子臨嗣卒子放嗣卒子純嗣建武初

改封武始侯卒子奮嗣卒子甫嗣卒子吉經歷箕

嗣無子國除此言八代者除安世始封也

亂二百年間

篡亂謂王莽也張子孺昭帝元鳳六年封至永初三年合一百八十二年

故曰未嘗譴黜封者莫與為比

曹褒字叔通魯國薛人也父充持慶氏禮

前書沛人慶普字孝公為東平太傅受禮於后蒼號慶氏禮也建武中為博士

從巡狩岱宗定封禪禮還受詔議立七郊

三雍大射養老禮儀五帝及天地為七郊三雍以下解見明帝紀顯

宗即位充上言漢再受命仍有封禪之事

而禮樂崩闕不可為後嗣法五帝不相沿

樂三王不相襲禮禮記正文也言損益不同也大漢自制

禮以示百世帝問制禮樂云何充對曰河

圖括地象曰有漢世禮樂文雅出尚書璇

機鈴曰有帝漢出德洽作樂名予帝善之

下詔曰今且改太樂官曰太子樂詩曲操

以俟君子操猶曲也劉向別錄曰君子因雅琴之適故從容以致思焉其道閉塞悲愁而

作者名其曲曰操言拜充侍中作章句辯難於

是遂有慶氏學褒少篤志有大度結髮傳

充業博雅踈通尤好禮事常感朝廷制度

未備慕叔孫通為漢禮儀晝夜研精沈吟

專思寢則懷抱筆札行則誦習文書當其

念至忘所之適初舉孝廉再遷圍令屬陳

留故城在今汴州雍丘縣南也以禮理人以德化俗時它郡

盜徒五人來入圍界吏捕得之陳留太守

馬嚴聞而疾惡風縣殺之褒勅吏曰夫絕

人命者天亦絕之臯陶不為盜制死刑管

仲遇盜而升諸公禮雜記云孔子曰管仲遇盜取二人焉上以為公且注云

此人但居惡人之中使犯法耳今承旨而殺之是逆天心順

府意也其罰重矣如得全此人命而身坐

之吾所願也遂不為殺嚴奏褒更弱免官

歸郡為功曹徵拜博士會肅宗欲制定禮

樂元和二年下詔曰河圖稱赤九會昌十

世以光十一以興九謂光武十謂明帝十一謂章帝也尚書琰

機鈐曰述堯理世平制禮樂放唐之文本

文云使帝王受命用吾道述堯理代平制禮放唐之文化洽作樂名斯在宋均注云述脩也予末

小子託于數終曷以績興崇弘祖宗仁濟

元元帝命驗曰順堯考德題期立象宋均注曰

堯巡省於河洛得龜龍之圖書舜受禪後習堯禮得之演以為考河命題五德之期立將起之象凡三篇

在中且三五步驟優劣殊軌孝經鉤命決曰三皇步五帝驟

候也三王馳宋均注云步謂德隆道用日月為步時事沉彌順日月亦驟勤思不已日月乃馳是優劣也

于頑陋無以克堪雖欲從之末由也已每

見圖書中心惡焉褒知帝旨欲有興作乃

上疏曰昔者聖人受命而王莫不制禮作

樂以著功德功成作樂化定制禮所以救

世俗致禎祥為萬姓獲福於皇天者也今

皇天降祉嘉瑞並臻制作之符甚於言語

言明白也宜定文制著成漢禮不顯祖宗盛德

之美章下太常太常巢堪以為一世大典

非褒所定不可許帝知羣僚拘攣難與圖

始拘攣猶拘束也前書鄒陽曰能越拘攣之語也朝廷禮憲宜時刊

立明年復下詔曰朕以不德膺祀宗弘烈

乃者鸞鳳仍集麟龍並臻甘露宵降嘉穀

滋生赤草之類紀于史官赤草即朱草也大戴禮曰朱草日生

一葉至十五日十六日朕夙夜祗畏上無以彰

于先功下無以克稱靈物漢遭秦餘禮壞

樂崩且因循故事未可觀省有知其說者

各盡所能褒省詔乃歎息謂諸生曰昔奚

斯頌魯韓詩曰新廟弈弈奚斯所作薛君傳云是詩公子奚斯所作也考甫詠

殷正考甫孔子之先也作商頌十二篇夫人臣依義顯君竭忠

彰主行之美也當仁不讓吾何辭哉遂復

上疏具陳禮樂之本制改之意拜褒侍中

從駕南巡既還以事下三公未及奏詔召

玄武司馬班固玄武司馬主玄武門續漢志云官掖門每門司馬一人秩比千石也

問改定禮制之宜固曰京師諸儒多能說

禮宜廣招集共議得失帝曰諺言作舍道

邊三年不成會禮之家名為聚訟言相爭不定也

互生疑異筆不得下昔堯作大章一夔足

矣夔堯樂官也呂氏春秋曰魯哀公問於孔子曰樂正夔一足矣章和元年正

月乃召褒詣嘉德門令小黃門持班固所

上叔孫通漢儀十二篇勅褒曰此制散略

多不合經散略猶踈略也今宜依禮條正使可施行

於南宮東觀盡心集作褒既受命乃次序

禮事依準舊典雜以五經讖記之文撰次

天子至於庶人冠婚吉凶終始制度以為

百五十篇寫以二尺四寸簡其年十二月

奏上帝以衆論難一故但納之不復令有

司平奏會帝崩和帝即位褒乃爲作章句

帝遂以新禮二篇冠擢褒監羽林左騎漢官

儀曰羽林左騎秋六百石領羽林屬光祿勳也永元四年遷射聲校尉

後太尉張酺尚書張敏等奏褒擅制漢禮

破亂聖術宜加刑誅帝雖寢其奏而漢禮

遂不行褒在射聲營舍有停棺不葬者百

餘所褒親自履行問其意故吏對曰此等

多是建武以來絕無後者不得埋掩褒乃

愴然爲買空地悉葬其無主者設祭以祀

之遷城門校尉將作大匠時有疾疫褒巡

行病徒爲致醫藥經理饘粥多蒙濟活七

年出爲河內太守時春夏大旱糧穀踊貴

褒到乃省吏并退去姦殘澍雨數降其

秋大孰百姓給足流冗皆還後坐上災害

不實免有頃徭再遷復爲侍中褒博物識

古爲儒者宗十四年卒官作通義十二篇

演經雜論百二十篇又傳禮記四十九篇

教授諸生千餘人慶氏學遂行於世

論曰漢初天下創定朝制無文叔孫通頗

採經禮參酌秦法雖適物觀時有救崩敝

然先王之容典蓋多闕矣容禮容也典法則也謂行禮威儀府

仰之容貌也文帝時魯徐生以容為禮官一何襄亦善為容容或作宏義亦通也是以賈誼

仲舒王吉劉向之徒懷憤歎息所不能已

也賈誼等以叔孫通禮制疎略並止書對策請更改作皆不從所以歎息也班固曰今大漢久曠大義

此賈誼仲舒王吉劉向之徒資文宣之遠圖明

所為發憤而增歎也見前書

懿美而終莫或用資用也言用文帝宣帝美略遠謀而終不能用賈誼等言

誼文帝時人王吉宣帝時人故知自燕而觀有不盡矣禮記

曰孔子之喪有自燕來觀者舍於子夏氏子夏曰聖人之葬人與人之葬聖人也子何觀焉有不盡矣言未備

孝章永言前王明發興作明發謂發夕至明也詩曰

明發不寐專命禮臣撰定國憲洋洋乎盛德之

事焉洋洋美也而業絕天筭議黜異端斯道竟

復墜矣業絕天筭謂章帝晏駕也議黜異端謂張酺等奏褻擅制禮遂不行也夫三

王不相襲禮五帝不相沿樂所以成莖異

調中都殊絕咸成池黃帝樂也莖六莖顓頊樂也見前書異調言古今不同處中都魯

邑名也家語曰孔子為中都宰制為養生送死之節殊絕猶斷絕也言古樂不同舊禮亦絕也況物

運遷回情數萬化制則不能隨其流變品

度未足定其滋章言時代遷移繁省不定也斯固世主所

當損益者也且樂非夔襄而新音代起律

謝臯蘇而制令亟易夔舜樂官襄魯樂官也臯繇虞士官蘇忿生周武王

之司修補舊文獨何猜焉言刑樂數改而禮

云禮云曷其然哉歎其不能定也

鄭玄字康成北海高密人也八世祖崇哀

帝時尚書僕射玄少為鄉嗇夫前書曰鄉有嗇夫掌聽訟

收賦得休歸常詣學官不樂為吏父數怒之

不能禁鄭玄別傳曰玄年十二隨母還家正臘會同列十數人皆美服盛飾語言閑通玄獨漠

然如不及毋私督數之乃遂造太學受業師事

京兆第五元先始通京氏易公羊春秋三

統歷九章算術三統歷劉歆所撰凡九章算術周公作也凡有九篇方曰一粟

米二差分三少廣四均輸五方又從東郡張恭祖

受周官禮記左氏春秋韓詩古文尚書以

山東無足問者乃西入關因涿郡盧植事

扶風馬融融門徒四百餘人升堂進者五

三十八

十餘生融素驕貴玄在門下三年不得見
乃使高業弟子傳授於玄玄日夜尋誦未
嘗怠倦會融集諸生考論圖緯聞玄善集
乃召見於樓上玄因從質諸疑義問畢辭
歸融喟然謂門人曰鄭生今去吾東道矣
前書曰田何受易於丁寬學成
寬東歸何謂門人曰易東矣玄自遊學十餘
年乃歸鄉里家貧客耕東萊學徒相隨已
數百千人及黨事起乃與同郡孫嵩等四
十餘人俱被禁錮嵩字廣實
見趙岐傳遂隱修經業杜

門不出時任城何休好公羊學遂著公羊

墨守言公羊義理深遠不可
駁難如墨翟之守城也左氏膏育說文曰
育膺也

心下為膏喻左氏
之疾不可為也穀梁廢疾玄乃發墨守鍼

膏育起廢疾休見而歎曰康成入吾室操

吾矛以伐我乎初中興之後范升陳元李

奇賈逵之徒爭論古今學後馬融荅北地

太守劉瓌及玄荅何休義據通深由是古

學遂明靈帝末黨禁解大將軍何進聞而

辟之州郡以進權戚不敢違意遂迫脅玄

不得已而詣之進為設几杖禮待甚優玄

不受朝服而以幅巾見一宿逃去時年六

十弟子河內趙商等自遠方至者數千後

將軍袁隗表為侍中以父喪不行國相孔

融深敬於玄屣履造門屣謂納履未正曳之而行言趨賢急也告

高密縣為玄特立一鄉曰昔齊置士鄉仲管仲

相桓公制國為二十一鄉工商鄉六士鄉十五以居工商士也事見國語也

越有君子軍皆異賢之意也吳越相攻越王勾踐乃中分其師為中軍注云君子王所親近有至行者見國語鄭君好學實懷明德昔

太史公廷尉吳公謁者僕射鄧公皆漢之

名臣又南山四皓有園公夏黃公潛光隱

耀世加其高皆悉稱公吳公文帝時為河南守鄧公景帝時為謁者僕

射太史公司馬談武帝時四皓高帝時也有園公夏黃公角里先生綺里季也須眉皓白故言皓秦時隱於商

雒南山以待天下之定漢興迎而致之也然則公者仁德之正號不

必三事大夫也今鄭君鄉宜曰鄭公鄉昔

東海于公僅有一節猶或戒鄉人侈其門

問一節謂決獄也昭帝時東海于公為縣獄吏決獄平郡為生立祠號曰于公祠先是于公問門壞父

老方共修之于公曰少高大其門令容駟馬車我決獄多陰德子孫必有興者也矧乃鄭

公之德而無駟牡之路可廣開門衢令容
高車號為通德門董卓遷都長安公卿舉
玄為趙相道斷不至趙王虔之相也會黃巾寇青部
乃避地徐州徐州牧陶謙接以師友之禮
建安元年自徐州還高密道遇黃巾賊數
萬人見玄皆拜相約不敢入縣境玄後嘗
疾篤自慮以書戒子益恩曰吾家舊貧不
為父母羣弟所容去廝役之吏廝賤也於學周
秦之都往來幽并兗豫之域獲觀乎在位

通人處逸大儒得意者咸從捧手有所受

焉處逸謂處士隱逸之大儒遂博稽六藝粗覽傳記時觀

秘書緯術之奧年過四十乃歸供養假田

播殖以娛朝夕遇闡尹擅執坐黨禁錮十

有四年而蒙赦令舉賢良方正有道辟大

將軍三司府公車再召比牒併名卑為宰

相比牒猶連牒也併名謂齊名也言連牒齊名被召者並為宰相也併音步鼎反

惟彼數公懿德大雅克堪王臣故宜式序

式用也吾自忖度無任於此但念述先聖

之元意思整百家之不齊亦庶幾以竭吾
才故聞命罔從而黃巾為害萍浮南北復
歸邦鄉入此歲來已七十矣宿素衰落仍
有失誤案之禮典便合傳家傳家謂家事
傳子孫也曲
禮曰七十
老而傳今我告爾以老歸爾以事將閑
居以安性覃思以終業自非拜國君之命
問族親之憂展敬墳墓觀省野物胡嘗扶
杖出門乎家事大小汝一承之咨爾兢兢
一夫曾無同生相依其勗求君子之道研

鑽勿替敬慎威儀以近有德詩大雅民勞
篇之言也顯

譽成於僚友德行立於己志若致聲稱亦

有榮於所生可不深念邪可不深念邪吾

雖無紱冕之緒頗有讓爵之高謂類被
不就也自

樂以論贊之功庶不遺後人之羞末所憤

憤者徒以亡親墳壟未成所好羣書率皆

腐敝不得於禮堂寫定傳與其人其人謂好
學者也前

書司馬遷曰僕誠已
著此書傳之其人也日西方暮其可圖乎家今

差多於昔勤力務時無恤飢寒菲飲食薄

衣服節夫二者尚令吾寡恨若忽忘不識
亦已焉哉時大將軍袁紹總兵冀州遣使
要玄大會賓客玄最後至乃延升上坐身
長八尺飲酒一斛秀眉明目容儀溫偉紹
客多豪俊並有才說見玄儒者未以通人
許之競設異端百家互起玄依方辯對咸
出問表皆得所未聞莫不嗟服時汝南應
劭亦歸於紹因自贊曰故太山太守應中
遠北面稱弟子何如玄笑曰仲尼之門考

以四科

四科謂德行言語政事文學顏淵閔子騫及子游子夏並見論語也

回賜之

徒不稱官閔劭有慙色紹乃舉玄茂才表
為左中郎將皆不就公車徵為大司農給
安車一乘所過長吏送迎玄乃以病自乞
還家五年春夢孔子告之曰起起今年歲
在辰來年歲在巳

北齊劉晝高才不遇傳論玄曰辰為龍巳為蛇歲至龍蛇

賢人嗟玄以識合之蓋謂此也

既寤以識合之知命當終有

頃寢疾時袁紹與曹操相拒於官度

官度津名

也在今鄭州中牟縣北前書音義曰於滎陽下引河東南為洪溝以通宋鄭淮泗即今官度

令其

子譚遣使逼玄隨軍不得已載病到元城
縣疾篤不進其年六月卒年七十四遺令
薄葬自郡守以下嘗受業者縑經赴會千
餘人門人相與撰玄荅諸弟子問五經依
論語作鄭志八篇凡玄所注周易尚書毛
詩儀禮禮記論語孝經尚書大傳中候乾
象歷又著天文七政論魯禮禘祫義六藝
論毛詩譜駁許慎五經異義荅臨孝存周
禮凡百餘萬言
案謝承書載玄所注與此略
同不言注孝經唯此書獨有

也玄質於辭訓通人頗譏其敏示至於經傳

洽孰稱為純儒齊魯間宗之其門人山陽

郝慮至御史大夫東萊王基清河崔琰著

名於世又樂安國淵任遐
慮字鴻豫基字伯輿
魏鎮南將軍安樂鄉

侯琰字季珪魏東西曹掾遷中尉淵字子尼
魏司空掾遷大僕遐字昭光魏黃門侍郎也時並

童幼玄稱淵為國器遐有道德其餘亦多

所鑒拔皆如其言玄唯有一子益恩孔融

在北海舉為孝廉及融為黃巾所圍益恩

赴難墮身有遺腹子玄以其手文似己名

之曰小同

魏氏春秋曰小同高貴鄉公時為侍中嘗詣司馬文王文王有密疏未之屏也

文王曰寧我負卿無卿負我遂醜之

論曰自秦焚六經聖文埃滅

埃塵也

漢興諸

儒頗修藝文及東京學者亦各名家而守

文之徒滯固所稟

稟受滯固猶固執也言學者各守所見不疏通也

異

端紛紜互相詭激遂令經有數家家有數

說章句多者或乃百餘萬言學徒勞而少

功後生疑而莫正鄭玄括囊大典網羅衆

家

括結也易坤卦曰括囊無咎也

刪裁繁誣刊改漏失自是

學者略知所歸王父豫章君每考先儒經

訓而長於玄

王父祖父也爾雅曰父之父為王父也范曄祖父審字武子晉武帝時為

豫章太守經義每以玄為長也

常以為仲尼之門不能過也

及傳授生徒並專以鄭氏家法云

言審教授專崇

鄭學也

贊曰富平之緒承家載世

載重也易師卦曰大君有命開國承

家伯仁先歸釐我國祭

釐理也言純釐理禘祫之祭也

玄定

義乖褻修禮缺孔書遂明漢章中輟

孔書謂六

經也輟止也中輟謂曹褒禮不行也

後漢列傳卷第二十五

列傳第二十六

范曄

後漢書三十六

唐章懷太子賢注

鄭興

范升

陳元

賈逵

張霸

鄭興字少贛河南開封人也少學公羊春

秋晚善左氏傳遂積精深思通達其旨

同學者皆師之

東觀記曰興從博士

天鳳

中

主莽年也

將門人從劉歆講正大義

左氏義也

歆美興才使撰條例章句訓詁及校三

